

跋

譜者普也言普一族之人使各徵其實於譜以信今而傳後也
吾族籍本江州自 朝禕公仕唐官鎮潭州始南遷於長沙霧
陽鄉立業大塘滄浪溪等處迄今世遠年湮而其淵源猶可溯
者以賴有譜帙之存使後嗣子孫皆得以觸於目而警於心則
譜之有益於後人也豈淺鮮哉嘉慶甲戌歲我北門老祠曾纂
修家乘以示來茲 族等每取而閱之凡我 祖之世德作求無
不昭然可考惟是先塋所在往蹟所存譜載雖詳循其名或莫
指其處甚或併其名而沒之歷時愈久失實愈多咸豐初嘗以

此意告之我祠族眾酌議續譜迺以粵氛未靖眾有難色議遂寢而余心終耿耿焉所可幸者某等食舊德服先疇惟有厯年猶守先人之故地凡所爲坵壠之重手澤之遺父老流傳尙得指其一二如滄浪橋者三世祖 英仲公所建也自二十四世祖滄浪公續修以來距今又十餘世矣輪蹄絡繹石漸傾頽歲乙卯某等倡議重修以新祖蹟由是族之人得履其處以爲斯地誠我祖發源之所也其近橋左右祖墓最多某者碑銘確據某者形勢足徵舉平日所爲覽譜而興思者一旦得以徵其實其維持保護當何如也族望諸公乃奮然爭起僉曰此固宜作

長久計遂更集金隨置蕃家墩業以建公祠使族人咸得以申其
孝享雖然吾族子姓浩繁如星羅碁布使有祠以合之而無譜
以辨之則歲時祭祀保無倫次之或淆乎此通譜之作尤宜亟
亟也上自始遷祖起下迄太字派止昭穆定而支派分本本原
原有條不紊則各接支祖者皆得取證於茲以因端而竟委且
凡祠內訓約家規祀田祭典無不備具其足以信今而傳後無
疑也後有作者飲水而思其源發華而培其本當必有紹前徽
而光大之者藏等於譜帙告成之候叙一言以附諸簡編庶亦
得邀其末照云

咸豐九年季夏三十六派孫漢斌王田氏漢川昆泉氏全跋

跋

竊聞靈樹干雲霄之勢枝幹扶蘇仙槎泛牛斗之辰源流匯合
慈孫孝子固不忘其始生尊祖敬宗要惟務乎收族繫明明我
祖實赫赫先聲重華流蒲坂之芳大孝啓瓜綿之瑞洎三恪崇
封於赤代暨九韶遺韻於青齊遂爾星象凝輝聚占東井允矣
玉音煥彩義著西江雀酒流馨一室覘三千之盛鳳鳴紹吉九
漣徵十一之榮迺矜恤來綸綍之恩而斷分開離索之漸水源
木本蜿蜒厯卅世之傳傳著佈星羅蕃衍遍一荆之域歎幾處華
零棠棣問何年秀聚芝蘭則有繩武薛君敦仁蘇子聯雲仍之

脈絡歷星月之勞勤根節守眞天使不受梁公之象枝柯必正
崇韜不拜子儀之墳爰及己未居諸藏成乙卯事緒以昭來之
志爲乘牒之修長幼尊卑劃然鐵板親疎遐邇貫若珠繫何非
虞代之貽謀悉是潁川之貴系則知千巖聳翠肇自崑崙萬壑
朝宗歸于星宿繩繩子姓忻觀數百代新編緝緝宗支喜接億
萬年盛紀吾支發源媯汭卜吉古羅敢擬鋪張協祝敵笙鏞而
不朽聊伸固鄙續南陔華黍以長留湘邑二十五世孫榮芬桂
齡氏謹跋

咸豐九年己未歲仲夏月穀旦